

ISRAELGO MIRARIAK. <sup>1</sup>

GURE AITA SANTU LEON XIII-GARRENARI BERE URREZKO EZTEGETAN.

«Neu naz.»

S. JOANEK 18 KAP. 5 BER.

Denporea da ausi jatala  
 Lira zolia,  
 Soñu artetik guztizko urrin  
 Gaur naiz bizi,  
 Basamortuan erbesteturik  
 Aurkietan naz,  
 Egun garratzak ditugulako  
 ¡Ai! jadichi.

Nire musacho biotzekoa  
 ¿Ez al dakizu  
 Bizimodu au jatala triste,  
 Eta samiñ;  
 Gura al dozu lira bagarik  
 Nagoalako,  
 Koldar bat legez kobaren baten  
 Gorde nadiñ?

Adore baga neguko chori  
 Mutu bat legez,  
 Otzak kikillik, chio bat bere  
 Egin baga,  
 ¿Gura al dozu erneguren bat  
 Nik egitea,  
 Adietara emonaz etsi  
 Genduala?

Isilltasun au illteko betor  
 Lira barri bat,  
 Musa, ekatzuz gogoraziño  
 Eregiak,  
 Irudi onak, etorki gozo,  
 Itz egokiak,  
 Kantau daidazan gaur Israelgo  
 Mirariak.

Gaur Israelgo mirariak nik  
 Kantau nai ditut,  
 Jazoak legez jazotekoak  
 Iragarri,  
 Gure Jaungoiko mirarigiñak  
 Deutsazalako  
 Oraindik asko egingo bere  
 Erriari.

Onen mirariz beñ-ichasoa  
 Erdibitu zan,  
 Jordan atzeruntz beste beñ asi  
 Igesika,  
 Mendiak salto ariak legez  
 Egiñ eben ta  
 Bildotsak legez mendiskak bere  
 Ikotika.

(1) V. nota de la pág. 1.

Onen mirariz mana jasten zan  
 Inotza legez,  
 Erri bateri izan ekion  
 Bizigeya,  
 Beronek nai ta, gizon on baten  
 Esan utsera  
 Geldi jarri zan, loturik legez,  
 Eguzkia.

Onek nai eta beste bein bere  
 Ichas-arroa,  
 ¿Ez dok gomutan jarri intzala  
 Beeraturik,  
 Esan orduko ontzi batetik  
 Jaun altsu onek,  
 Geratu ari isillik eta  
 Mututurik?

Jarraik jarraitu Jaun onek isten  
 Badeusk oraindik,  
 Barauts ta bitzok odeyez gora  
 Boteagaz,  
 Baña mukerra, baldin ez badok  
 Inoz garaitu,  
 ¿Noz urten daikek beronen kontra  
 Garaitzagaz?

Badarozak emeretzi bat  
 Gizaldi iya,  
 Adarka, adarka, eten bagarik  
 Ontzi orri;  
 Baña alan bere ez gayoazak  
 Gu oraindiño,  
 I gora bera deitutera. Jaun  
 Altsu oni.

Igora bera ez gayoazak  
 Lorik galtzera,  
 Ez ta bildurrik egitera gaur  
 Erakutsi,  
 Echuogu nai beste bein legez  
 Esan dagian,  
 Guk daukagula berorregana  
 Fede gichi.

Balea legez baña baletok  
 Ur-mendiren bat,  
 Ago zabalaz iruntsi nairik  
 Sabelera,  
 Ontzitik salto egin baño len  
 Orduan bere,  
 Asiko gaituk modu onetan  
 Deitutera.

Salbau gagizuz, mirari barri  
 Bategaz Jesus,  
 Itzala sartu egiezu gaur  
 Aise dongai,  
 Esnatu zaitte бага-zezenok  
 Otzanduteko,  
 Dakielako obediatan  
 Zure esanai.

Salbau gagizuz, trumoi chimista  
 Oneen erdian,  
 Desegiguzu gaiztakeria  
 Tryuutsua,  
 Eguzkiaren begi zorrotzak  
 Laster desegin  
 Daroen legez aurrean dauken  
 Odeichua.

Salbau gagizuz, ikusi dayan  
 Ichas-zartadak,  
 Direan legez acharen kontra  
 Birrinduten,  
 Gaiztakeria azartu onek  
 Zelan bereak  
 Pedroren kontra beti dabela  
 Ustel urten.

Salbau gagizuz, ikusi dayan  
 Zure Eleiſa,  
 Dala mendi bat Olinpo baño  
 Goragua,  
 Onek azpian artzen dituan  
 Legez ekachak,  
 Zure mendiak dabela artzen  
 Infernua.

Salbau gagizuz, infernutarrok  
 Ikusi dayan,  
 Pedro dagola ach bat duiñ gogor  
 Sinistean,  
 Dakialako beste ainbeste  
 Mirari, Jesus,  
 Daikezuzala aiſe, ur, eta  
 Leorrean.

Salbau gagizuz, salbau, bai, Jauna,  
 Ardi ta bildots,  
 Geure Artzaiñaz gagozan danok  
 Zuri deyez,  
 Eta uretan dabiltzan bale  
 Izugarriok,  
 Otzan-otzanik gure sareetan  
 Jausi bitez.

Mundu guztira sare oneſek  
 Bota nai doguz,  
 Arraiñ ta abere dan-danak artu  
 Dagiezan,  
 Arrantzale bat izan dakigun  
 Danoen buru,  
 Danok kristiñau egindakoa,  
 Gure Eleiſan.

Leon amairu-garrena dogu  
 Arrantzale au,  
 Zergatik berak zuzentzen daben  
 Eleiſea,  
 Leon amairu-garrena Artzaiñ,  
 Aita Santu ta  
 Leon amairu-garrena baita  
 Erregea.

¡O! Leon andi miragarria!  
 ¡Nok leukekezan  
 Zu jasoteko berba duiñ, eta  
 Eregiak,  
 Mundu guztian dozuzalako  
 Zuk, zeuk bakarrik,  
 Zeruko atea zabalduteko  
 Giltza biak!

Zuri begira nago emendik  
 Zar itzaltsua,  
 Zakustaz gure Arbolearen  
 Irudian,  
 Ikusten zaitut au mutildurik  
 Dakustan legez,  
 Modu berean zelan gagozan  
 Italian.

Ikusten dot nik ereñotzezko  
 Aroz jantzirik,  
 Gaiztakeria eskerga orren  
 Egillea;  
 Baña, ostarku barri bat laster  
 Jayoko jaku,  
 Zein izango dan egun obeen  
 Señalea.

Neu naz, neu naz, bai, Jesusek las-  
 Esango dau, ta [ter  
 Ikusiko da bere berbeak  
 Zer al daben,  
 Ikusiko da gaiztakeria  
 Armaz jantzia,  
 Zelai lurrera beti betiko  
 Dala jausten.

Ikusiko da egiaztuten  
 Aren berbea,  
 Baita betetan arek agindu  
 Ebazanak,  
 Ikusi geinkez zerutik jausten  
 Izarrak baña,  
 Ez uts emoten Pedrori  
 Esan eutsazanak.

Ikusiko da irago zala  
 Charren tandea,  
 Ikusiko da dongak ebela  
 Jo azpia,  
 Ikusiko da euren sutunpak  
 Eziñ ebela  
 Zelaitu Leon jazarriten dan  
 Jartokia.

Baña ikusi ezkeru preso  
 ¡O! Artzaiñ ona!  
 ¿Zein ardi ez da zure okerraz  
 Saminduko?  
 ¿Zein bertsolari Erroman zugaz  
 Gertetan danaz  
 Ez da asarre santuzko suaz  
 Iñiotuko?

Biztzen nozu bai, lira motel au  
 Zolituteko,  
 Sututen nozu zorrozituteko  
 Luma motza,  
 Garretan jarten artzeko bere  
 Zure aldera  
 Ezpata miñ bat zure naya gaur  
 Au balitza.

Odei burruken burrundaretan,  
 Ene Erregea,  
 Achak badodaz dardar saltoka  
 Ikusiten,  
 Zure etsayen sutunpen otsak  
 Entzun ta ¿ez da  
 Gure biotzik saltoz asiko  
 Irakiten?

Neri taupaka beintzat asi jat  
 Egon ezinda,  
 Gerrara diñost gura dabela  
 Urtetea,  
 Gerran, bai gerran, gerran zugatik  
 Milla bizitza  
 Baleukaz bere, gerran nai leukez  
 Emotea.

Parkatu Aita, berbaren baten  
 Erratu badot,  
 Askatuagaz ainbesteraño  
 Barrua nik,

} Esku orregaz indazu arren  
 Bendeziñoa,  
 Auše artzeko jarten nachatzu  
 Auspazturik.

FELIPE ARRESE TA BEITIA.

Ochandion, 1887-ko urtean.

---

## AITA SANTUARI.

---

Zure oroitza letraz nai nuke  
 Zabaldu mundu guztian,  
 Irakurririk jendea sutu  
 Dedien fede bizian.  
 Nola zeraden Apaiz ta Kristau  
 Guzti-guztien burua,  
 Jainkoak eman dizaizula ¡bai!  
 Biar dan argi osua,  
 Ta zaitzatela gizonak maita  
 Ta errespetatu gogotik,  
 Dituzulako, Aita Santua,  
 Maitatzen denak biotzetiz

JOSÉ ZAPIRAIN.

Donostian.

---